

Pantun Warisan Indera Kayangan

Suntingan : WAN NAN WAN MAHMUD (FAWANA)

Pokok nangka pohon cempedak,
Pecah-pecah bunga senduduk;
Kecil jangan di sangka budak,
Gajah tersungkur oleh pelanduk.

Simpang Empat sampai ke Bintong,
Jalan rnelintas Utan Aji;
Kalau dapat memanglah untung,
Kalau terlepas gigit jari.

Tebing Tinggi pangkalan ikan,
Anak Cina menjual telur;
Adik di sini rindu tak makan,
Abang di sana rindu tak tidur.

Tetak buluh dibuat pagar,
Mari diikat dengan rotan;
Gunung runtuh bumi bergegar,
Gempa tidak kiamat pun bukan.


Cik Saad membeli pinang,
Pinang dibeli Kampung Sena;
Puan ingat saya kenang,
Baru boleh kawan lama.

Cik Siti anak Cik Hanafiah,
Bangkit pagi menjahit kupiah;
Laksana buah masak sebelah,
Hendak ku telan serba-salah.

Dari Gunung ke anak Bukit,
Singgah semalam di Bukit Pinang;
Dahulu hati terasa sakit,
Sekarang hati merasa senang.

Dari jauh nampak kelabu,
Nampak ke Gunung Jerai;
Ini malam kita bertemu,
Besok hari kita bercerai.

Dari mana hendak ke mana,
Dari sawah turun ke padi;
Duduk jauh di mana-mana,
Budi tak lupa di dalam hati.



Dari Siam pergi ke Kelantan,
Dari Kelantan ke Negeri China;
Sesal dahulu jadi pendapatan,
Sesal kemudian tiada guna.

Dari teluk pergi ke pekan,
Singgah bermalam di Batu Lima;
Sekalian makhluk Tuhan jadikan,
Kaya miskin dipandang sama.

Datuk Kelana pergi menangguk,
Tersangkut tangguk di sauh kapal;
Saya umpama orang mengantuk,
Apatah lagi disorong bantal.

Gesek biola tali empat,
Putus satu tali kecapi;
Sudah cari merata tempat,
Baru dapat kehendak hati.

Jurumudi mana haluannya,
Barat daya angin kencang;
Baik budi apa balasnya,
Doa minta umur panjang.


Kain putih buat pemedang,
Kain dijahit lipat tepi;
Sana kasih sini sayang,
Mana tempat letak hati.

Buah berangan masak hijau,
Masak sebiji di Tanah Rata;
Luka tangan kerana pisau,
Luka hati kerana kata.

Buah limau tiga serungkul,
Masak sebiji disambar helang;
Kalau mahu khabar betul,
Tidak payah abang berulang.

Bunga Cina di dalam taman,
Sayang keduduk bercabang dua;
Dunia ini pinjam-pinjaman,
Nak tumpang duduk sehari dua.

Dari Wat ke Kampung Petai,



Singgah semalam di Kampung Abi;
Perkara yang buat jangan dikesal,
Ikutlah untung apa nak jadi.

Pohon kelapa tumbuh di pantai,
Rumpun padi pangkal memelam;
Ilmu apa cik adik pakai,
Senyum pagi manis ke malam?

Pohon Kemboja dahan bercantum,
Tempat Jentayu membuat sarang;
Semalam sahaja baru berkuntum,
Sekarang layu bilakah kembang?

Burung merpati bertelur tunggal,
Menetas anak turun ke paya;
Ibu mati bapa pun meninggal,
Di manalah tempat kami nak bermanja.

Cik Ali belayar ke Bangka,
Tupai nandung makan padi;
Siang malam tidak ku sangka,
Sudah terkandung di dalam hati.

Dari Acheh belayar ke Kedah,
Beli kurau dengan senangin;
Orang berkasih bukan mudah,
Umpama wau mencari angin.

Dari Johor ke Majapahit,
Singgah semalam di Pulau Bentan;
Sudah masyhur nama yang baik,
Barulah bertuah permintaan badan.

Kain putih koyak ditengah,
Pakaian anak naik ke hulu;
Tengah kasih datang fitnah,
Biar saya berundur dahulu.

Lang Buana mengait ciku,
Gugur sebiji ke Majapahit;
Hilang warna menikam biru,
Terkena sinar intan yang baik.

Merak hijau di cabang patah,
Anak puyu di dalam padi;
Lagi ku tinjau lagi jauh,
Berasa sayu di dalam hati.

Naik bukit meraut nibung,
Buat perangkap musang jebat;
Penyakit lain boleh ditanggung,
Penyakit rindu tak ada ubat.

Nasi kuning semangkuk sabun,
Mari jamu Raja China;
Putih kuning bunga di kebun,
Kembang sekuntum orang yang punya.

Batu Malim dua kerusi,
Boleh kita belayar kapal;
Kalau beli kain dua helai seragi,
Boleh kita bertukar pakai.

Bawa tombak bawa cermin,
Rendang lada simpul pulih;
Tengok gambar dalam cermin,
Sungguh ada nak ambil tak boleh.


Nasi kunyit gulai ayam,
Mari makan di Batu Melintang;
Topi senget jalan malam,
Jalan mencari sanggul melintang.

Orang Daik mudik ke hulu,
Patah galah hutan seberang;
Hati yang baik siapa nak tahu,
Tingkah laku dipandang orang.

Pohon sena cabangnya empat,
Mari terbang waktu pagi;
Kalau kena dengan makrifat,
Burung terbang menyerah diri.

Pohon senduduk pohon serai,
Pohon senduduk buat pedati;
Dengar kokok berderai-derai,
Melihat ekor bergelumang tahi.

Pohon temak akar pun temak,
Gugur di kuala bunga sekuntum;
Diluah bapa ditelan emak,
Sampai bila hendak dikulum.



Pohon teratai pohon telepat,
Pohon tebu di dalam padi;
Sireh diunjuk pinang tak dapat,
Rasa terbuku di dalam hati.

Pagi-pagi makan nasi lemak,
Mari makan sambil mengarut;
Yang kena itu tempat tak gamak,
Tempat yang bagus tak mahu diurut.

Patah galah di hujung tanjung,
Hendak belayar anginnya mati;
Kucing bergalah tikus berdayung,
Mengapa ikan menghempas diri?

Perahu sarat dimuat pinang,
Haluan menuju ke Kuala Daik;
Orang jahat lagi dikenang,
Inikan pula budi yang baik.


Nyiur muda jangan lebat,
Kalau lebat patah mayang;
Orang muda jangan mengebat,
Kalau ngebat ditinggal tunang.

Orang hulu memalu nobat,
Nobat dipalu kayu berangan;
Fikir dahulu sebelum buat,
Kalau dibuat menyesal jangan.

Padi basah di dalam paya,
Dibawa orang pergi ke kota;
Apa nak susah kepada saya,
Saya dah ada didepan mata.

Pergi seberang berangan-angan,
Membeli ikan ditimbang kati;
Banyak orang melarang jangan,
Saya seorang mengikut hati.

Dua belas gunung bertani,
Tanam nenas di dalam kebun;
Tuan tak balaskah dagang kami,
Siang berpanas malam berembun.



Sakit sungguh Raja Kuripan,
Sehari-hari menebang jati;
Mati ikan kerana umpan,
Manusia mati kerana budi.

Sapu tangan tepi berkelim,
Jahit baju benang berombak;
Sireh pinang dapat dikirim,
Rindu dendam siapa nak bawak?

Serai Acheh di atas tambak,
Kerat daun tepi telaga;
Bercerai kasih tiada bertalak,
Sepuluh tahun balik juga.

Tetak serentang bawa mudik,
Anak raja duduk di taman;
Duduk bertenang adik-beradik,
Bagai bunga kembang setaman.

Tiup api embun berderai,
Patah galah haluan perahu;
Niat di hati tak hendak bercerai,
Kuasa Allah siapa tahu.

Rujukan:

1. Encik Mahmud Wahid
2. Encik Wan Khazim Wan Din
3. Encik Ahmad Saad
4. Encik Hanapi Osman
5. Puan Haton Abdullah
6. Kurik-Kurik Merah Saga
(Kumpulan Pantun Lisan Melayu, DBP, 1990).

